



Komunikadu Imprensa
12 Marsu 2025

JSMP husu ba Órgaun Soberanu sira atu respeita prinsípiu separasaun podér ne'ebé konsagra iha Konstituisaun

JSMP husu ba órgaun soberanu sira atu respeita prinsípiu separasaun podér ne'ebé konsagra iha Konstituisaun Repúblika Demokrátika Timor-Leste (K-RDTL).

Iha artigu 69 Konstituisaun define katak órgaun soberanu sira, iha sira-nia relasaun entre sira no bainhira ezerse sira-nia funsaun, tenke tuir prinsípiu separasaun no interdependénsia iha podér ne'ebé estabelese iha Konstituisaun.

K-RDTL defini ho klaru kona-ba órgaun soberanu ida-idak nia kompeténsia, limitasaun kompeténsia no relasaun interdependénsia kompeténsia entre órgaun soberanu hirak-ne'e. Ida-ne'e signífika katak Konstituisaun separa no distribui ho klaru kompeténsia hosi órgaun soberanu ida-idak nian. Iha ámbitu perspetiva norma konstituisaun nian, la atribui kompeténsia ida todan liu ka órgaun soberanu ida iha kompeténsia ne'ebé ultrapasa ka aas liu hosi kompeténsia órgaun soberanu sira seluk.

Ho espresaun seluk katak la iha órgaun soberanu ida mak iha kompeténsia suprema hodi ezerse nia autoridade hodi impoen nia hakarak ba órgaun sira seluk, maibé iha de'it kompeténsia atu halo balansu de'it podér polítiku iha halo desizaun polítika sira. Prinsípiu ne'e atu asegura katak podér polítiku la bele konsentradu iha órgaun soberanu ida nia-liman no prevene ezersísiu sira ne'ebé fora hosi ninia limite. Mezmuke nune'e, Konstituisaun mós garante prinsípiu kontrolu no balansu/ekilíbriu (*check and balance*) liuhosi mekanizmu própriu ne'ebé Konstituisaun rasik estabelese.

Ne'e katak bainhira órgaun soberanu ruma, iha objesaun ka manifesta kontestasaun ruma relasiona serbisu hosi órgaun soberanu seluk, tenke apresenta liuhosi mekanizmu própriu ne'ebé lei estabelese, la'ós halo deklarasaun públiku, através média eletrónika no plataforma média sosiál sira seluk ho maneira no karáter ne'ebé intensionalmente atu hatún ka demoraliza no minimiza órgaun soberanu seluk ninia knaar no kompeténsia.

“Deklarasaun Xefe Órgaun Ezekutivu ne'ebé kestiona serbisu órgaun soberanu seluk no halo afirmasaun publikamente katak lafiar ona setór justisa, la hatudu sentidu respetu ba órgaun soberanu seluk no prinsípiu separasaun podér nu'udar Konstituisaun haruka, satán deklarasaun ne'e iha tendénsia atu demoraliza no hatún órgaun soberanu seluk ninia serbisu”, dehan Sra. Ana Paula Marcal, Diretora Ezekutiva JSMP.

JSMP rejista katak ne'e la'ós primeiraves Xefe Órgaun Ezekutivu minimiza no halo alegasaun hasoru tribunál nu'udar órgaun soberanu ninia knaar no serbisu. Iha okaziaun barak, tantu nu'udar Xefe Órgaun Ezekutivu ka ho kapasidade figura prominenti, sempre kalo kítika maka'as ba tribunál bainhira

desizaun tribunál kontráriu ho Xefe Órgaun Ezekutivu ninia perspestiva mezmuke desizaun ne'e tuir lei no ida-ne'e konstitui violasaun ba prinsípiu separasaun podér, independénsia no integridade judisiáriu no potencialmente konsidera nu'udar intereferénsia ba podér judisiáriu nian.

JSMP fiar katak pozisaun ne'ebé Xefe Órgaun Ezekutivu deklara ba públiku kona-ba rezultadu auditóriu tinan 2015 hosi Kámara Kontas, ne'ebé Tribunál Rekursu fó sai nu'udar deklarasaun ida-ne'ebé kontra-produtivu ba interese Estadu no ba sistema ne'ebé dekade rua resin elementu hothotu halo esforsu atu investe no dezenvolve.

Deklarasaun ho natureza protestu hosi Xefe Órgaun Ezekutivu ne'ebé la apresenta liuhosi mekanizmu própriu no lejítimu sei prodús efeitu polítika no sosiál boot kona-ba konfiansa públiku nian ba setór justisa no ida-ne'e sei la seguru ba interese Estadu no povu iha jerál.

Deklarasaun no afirmasaun ne'e sei kria impresan negativa no taka dalan ba oportunidade investimentu estranjeiru tanba Xefe Órgaun Ezekutivu rasik deklara katak nia la fiar setór justisa, enkuantu setór justisa la'ós de'it kona-ba relatóriu auditoria ne'e, la'ós de'it kona-ba língua Portugés, la'ós de'it kona-ba kestaun konfliktu entre orgaun soberanu sira, maibé setór justisa partense ba interese sosiál, kompromísu atu kombate korrupsaun no promove boa-governasaun no nu'udar elementu xave ba pilár demokrasia, garante prinsípiu Estadu direitu no sustenta planu dezenvolvimentu nasional.

JSMP konsiente katak tribunál bele halo sala ka potencialmente bele iha erru no irregularidade ruma akontese iha desizaun ne'ebé sira halo. Maibé nu'udar Estadu Direitu Demokrátiku, iha regra no mekanizmu própriu atu kestiona no kurrije erru no irregularidade hirak-ne'e.

Tanba ne'e dalabarak ona, JSMP ezije elementu hotu-hotu, tantu sira ne'ebé iha podér no autoridade no mós kualidade nu'udar Xefe Estadu, Xefe Órgaun Ezekutivu no membru sira, Xefe Órgaun Lejizlativu no membru sira, elementu no entidade estadu sira seluk no membru sociedade tomak tenke serbisu hodi investe iha sistema. Tanba sistema mak bele asegura, defende no proteje sidadaun hotu-hotu ninia direitu no prevene poténsia sira ba uza sala podér no autoridade.

Atu hetan informasaun kompletu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl